

10/12/1997

Konsert Riben Merah pupuk kesedaran

Ellyna Ali

KONSERT Riben Merah '97 yang berlangsung di Stadium Negara sempena Hari Aids Sedunia '97, Ahad lalu, bukan sekadar menampilkan hiburan malah bertujuan menyedarkan masyarakat mengenai bahaya Aids.

Sayangnya, konsert dengan tema Kanak-Kanak Yang Hidup Dengan Aids dibarisi artis terkenal itu tidak berjaya menarik kehadiran lebih daripada 1,500 penonton.

Bagaimanapun, keadaan itu tidak mematahkan semangat dalam persembahan yang turut terganggu oleh kelemahan sistem bunyi.

Farra membuka tirai menerusi lagu Bukalah Pagarmu menampilkan persembahan simbolik menerusi dua penari kanak-kanak berbaju putih diikuti Shahrizan yang ternyata mempunyai vokal yang hebat memberikan persembahan hebat menerusi The Greatest Love Of All.

Ruhil Amani pula membawakan lagu rancak, Bila Mentari Menyinar Kota bersama sekumpulan penyanyi latar sementara Nora pula mendendangkan lagu Teristimewa yang ditujukan khas kepada kanak-kanak mangsa HIV positif.

Kemunculan Ramli Sarip sememangnya ditunggu-tunggu. Dia mendendangkan lagu Senandung Pengkhayal yang dipetik daripada album terbarunya Syair Timur yang disampaikan dengan gaya tersendiri.

Camelia muncul mendendangkan lagu Erti Kehidupan sementara Ella pula mengalunkan lagu Demi secara bersahaja.

Awie mendapat tepukan gemuruh sebaik mendendangkan lagu Terima Kasih yang dipetik daripada album terbarunya.

Persembahan turut gamat ketika penyanyi popular, Ziana Zain muncul dengan joget ala Sepanyol menerusi lagu Kalau Mencari Teman.

Prema Lucas pula menutup tirai konsert dengan persembahan bertenaga ketika mendendangkan lagu I'm Alive Again.

Persembahan semua artis diselangi informasi mengenai Aids yang dipaparkan di kaca skrin dalam usaha mendidik masyarakat dan juga remaja Malaysia yang rata-rata penonton utama konsert itu.

Mesej konsert ini adalah jelas iaitu kasih sayang terhadap kanak-kanak yang dijangkiti HIV positif supaya mereka tidak disisihkan.

Konsert Riben Merah ini turut dihadiri oleh Perdana Menteri, Datuk Seri Dr Mahathir Mohammad bersama penaung Yayasan Aids Malaysia, Datin Paduka Marina Mahathir.

Konsert anjuran bersama oleh Yayasan Aids Malaysia, Persatuan Akademi Industri Muzik Malaysia dan TV3 wajar diberi pujian. Begitu juga dengan artis yang menjayakan konsert itu.

(END)